



P Z A P  
I P Ž P

REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
PANELI ZGJEDHOR PËR ANKESA DHE PARASHTRESA  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.64/2025

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Skender Çoçaj Kryesues, Kymete Kicaj dhe Arsim Hamzaj anëtarë, duke vendosur përkitazi me ankesat e subjektit politik Lidhja Demokratike e Kosovës (LDK), me seli në Prishtinë paraqitur kundër subjektit politik Lëvizja Vetëvendosje (LVV), me seli në Prishtinë, për shkak të vendosjes së posterit në hapësirë publike, për Zgjedhjet e Përgjithshme për Kuvendin e Republikës së Kosovës, që do të mbahen me datë 09.02.2025, në seancën e panelit të mbajtur me 20.01.2025, merr këtë:

#### V E N D I M

- I. Pranohet e bazuar ankesa e subjektit politik Lidhja Demokratike e Kosovës (LDK), me seli në Prishtinë, Anr.64/2025 e datës 18.01.2025
- II. Subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënim i më gjybë në lartësi prej 3,500.00 (tremijepesëqind) euro,
- III. Detyrohet Subjekti Politik Lëvizja Vetëvendosje (LVV), me seli në Prishtinë, që gjybën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

#### A r s y e t i m

Me datë 18.01.2025, PZAP-i, ka pranuar një ankesë nga subjekti politik Lidhja Demokratike e Kosovës (LDK), kundër subjektit politik Lëvizja Vetëvendosje LVV, me të cilën pretendon se subjekti politik LDK, dega në Pejë ka vërejtur se subjekti politik LVV, ka bërë shkelje të nenit 7 paragrafi 2 nënparagrafi 2.4 të Rregullores Zgjedhore Nr.07/2024, për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, me rastin e vendosjes së posterit të kandidatit për deputet Raif Qavolli, në hapsirë publike apo pronë shtetore - stadiumi i qytetit "Shahin Haxhiislami". Si provë parashtruesi i ankesës ka bashkangjitur një fotografi që dëshmon vendosjen e posterit.

Më datë 19.01.2025, PZAP-i, e njoftoi subjektin politik Lëvizja Vetëvendosje (LVV), me seli në Prishtinë, për ankesën e paraqitur kundër tyre, duke i dërguar kërkësë për përgjigje në ankesë deri me 20.01.2025 në ora 10:00.

Në përgjigje në ankesë të paraqitur me datë 20.01.2025, subjekti politik Lëvizja Vetëvendosje (LVV) ka kundërshtuar ankesën e subjektit politik Lidhja Demokratike e Kosovës, LDK, dhe ka theksuar se nga pamjet e bashkangjitura si prova vërehet se konstruksioni metalik për mbajtjen e billbordëve dhe fotove reklamuese, madje edhe njëra nga ato hapësira përdoret për të promovuar këto veprimtari, nga të cilat edhe kandidati jonë për deputet z.Raif Qavolli ka marrë shërbime, dhe se kandidati për deputet nga radhët e LVV ka pasur një marrëveshje valide me gojë të cilën e ka lidhur me mirëbesim me ofruesin e shërbimeve, të cilën e konsiderojmë se në legjislacionit në fuqi e njëjtë marrëveshje krijon efekte për palët si për të drejtat ashtu edhe për detyrimet e tyre, ku ndër të tjerash si detyrim i kandidatit tonë ka qenë pagesa e një shume të caktuar në bazë të marrëveshjes, kundrejt hapësires reklamuese.

Poashtu në përgjigje theksohet edhe se hapësira nga e cila janë të drejtuara këto reklama është jashtë kufirit të stadionit "Shahin Haxhiislami", qka nuk e bën përgjegjës kandidatin tonë për akuza se ka vendosur posterë në pronën publike, ashtu sic e ndalon ligji shfrytëzimin e saj për qëllime të fushatës.

Paneli, pasi që shqyrtoj të gjitha shkresat e lëndës gjeti se:

#### **Ankesa është e bazuar**

Paneli pas shikimit të shkresave të lëndës dhe përgjigjes në ankesë të paraqitur nga subjekti politik LVV, vlerësoj se pretendimet e subjektit politik LDK, janë të qëndrueshme dhe si të tilla i aprovoj përfaktin se veprimet e përshkruara në ankesë paraqesin shkelje të dispozitës së nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se "*Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganave në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose ne hapësirat private pa lejen e pronareve ose shfrytëzuesve.*"

Paneli poashtu vlerësoi se subjekti politik LVV, nuk ka siguruar asnjë provë për të dëshmuan se ka marrë leje nga ndonjë autoritet kompetent për të shfrytëzuar qoftë hapësirën publike apo atë private për qëllim të vendosjes së posterëve të tyre në fushatë zgjedhore, Njëherit konstatimi i subjektit politik se kandidati për deputet nga radhët e LVV, ka pasur një marrëveshje valide me gojë të cilën e ka lidhur me mirëbesim me ofruesin e shërbimeve, të cilën parashtruesi i përgjigjies në ankesë subjekti politik LVV, e konsideron se bazuar në legjislacionin në fuqi e njëjtë marrëveshje krijon efekte për palët si për të drejtat ashtu edhe për detyrimet e tyre andaj si detyrim i kandidatit në fjalë ka qenë pagesa e një shume të caktuar në bazë të marrëveshjes, kundrejt hapësires reklamuese, mirëpo lidhur me këtë subjekti politik LVV, nuk ka bashkangjitur asnjë provë e cila e mbështet per gjigjen për lidhje të ndonjë marrëveshje valide apo prove tjetër e cila tregon se ka leje nga ndonjë autoritet kompetent.

Neni 120 paragrafi 1 nën paragrafi 1.3 të LZP-së, thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 6 nën paragrafi 6.1 Rregullës Nr.01/2024, ku përcaktohet se "subjekti politik që është përfitues i fondeve për financimin e subjekteve politike përmes Buxhetit të Republikës së Kosovës dënoshet me gjobë deri në njëzetmijë (20, 000.00)euro.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përbën përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LVV, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Lëvizja Vetëvendosje-LVV, në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, të pa qëndrueshme dhe pa bazë ligjore si në dispozitat e Ligjit për Zgjedhje, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Nga arsyet e theksuara me lart, e në kuptim të nenit 34 paragrafi 1 nën paragrafi 1.2, nenit 118 paragrafi 1, neni 120 paragraf 1 nënparagrafi 1.3, të LZP-së, nenit 10 paragrafi 1, nënparagrafi 1.2 të Rregullores Nr.01/2024 për Procedurat e Parashtimit dhe Vendosjes së Ankesave vendosi si në dispozitiv të këtij vendimi.

### Paneli Zgjedhor për Ankesa dhe Parashtresa

Anr. 64/2025 më datë 20.01.2025



**Këshilla Juridike:** Kundër këtij vendimi nuk është e lejuar ankesa sipas nenit 118 par. 4 të LZP-së.